

Las immobilias drovan remedura

La vischnaunca da Laax investescha e vul dar impuls

■ (anr/abc) Investiziuns ella valeta da 7,755 milliuns francs fa la vischnaunca da Laax igl onn proxim. La radunonza communal ha approbau il preventiv 2017 senza discussiun. Tochen il 2019 vulan ins sanar ina part dallas habitaziuns da vischnaunca, la canzlia e la scola. Ei seigi lavurs necessarias ed ei hagi negin senn da semplamein referer ellas. La suprastanza hagi buc encuretq quellas investiziuns, ei seigi semplamein uras da far ei: Cun quell'argumentaziun ha il president communal Franz Gschwend perschadiu ils conscivichs. Duront la presentaziun dil preventiv ha el mussau ils detagls ed il plan dallas investiziuns. Ils proxims treis onns investescha la vischnaunca 5,845 milliuns francs ellas immobilias da vischnaunca. Mesjamna ha la radunonza communal da Laax approbau il preventiv 2017 cun gronda maiortad e senza discussiun. Il pievel va d'accord culla strategia dils proxims onns da sanar ina part dallas immobilias che la vischnaunca posseda.



Il president communal Franz Gschwend culs treis fideivels collaborators dall'administraziun communal: Toni Cadruvi, Gion Battista Camathias e Gieri Arpagaus (da sen.).

FOTO A. BEULI

Immobilias ella valeta da 50 milliuns
Gl'empren ha il president communal presentau il preventiv dil quon current 2017. Ils 100 presents han buca fatg objecziuns, il resultat duess semetter en retscha cun quel dils onns precedents. Tier entradas da 13,897 milliuns ed expensas da 12,468 milliuns francs duei quel serrar cun in surpli previu da 129'300 francs. Amortisaziuns vulan ins far ella valeta dad 1,3 milliuns francs. Igl onn proxim ein investiziuns ella valeta da 7,75 milliuns francs previdas. Cullas entradas ord contribuziuns ella valeta dad 1,6 milliuns francs seresultan investiziuns nettas da 6,155 milliuns francs. Ils projects gronds dil 2017 vegnan ad esser il luvratori forestal cun tegia d'ual Val Verena (2,4 milliuns francs) e la rundella Marcou (1,32 milliuns francs). Lu suondan las investiziuns ellas immobilias communalas. La vischnaunca da Laax posseda talas ella valeta da 50 milliuns francs. Ils proxims treis onns ston divers objects vegnir renovai

e sanai. Sco quei che la suprastanza communal ha presentau investesch'ins il 2017 el Center la Cauma a Demvigt ina summa da 530'000 francs. Igl ei l'emprena da treis etappas, tochen ils 2019 vegn quella casa cun habitaziuns e stizuns sanada per total 1,766 milliuns francs. Ella casa nr. 64 ch'ei ella vischinonza fan ins lavurs urgentas per 260'000 francs. Plinavon eis ei previu d'impunder igl onn proxim 540'000 francs per renovar la canzlia el center communal. Igl onn 2018 suonda lu la secunda etappa.

Pei da taglia resta sin 58 pertschien

Era ils preventivs dils consorzis da scola e scoletta sco era dil consorzis da scola superiura ha il suveran da Laax approbau. La casa da scola construida igl onn 1981 drova ina remedura pli gronda. Igl onn 2017 ein investiziuns dad 890'000 francs previdas, il

2018 suonda ina secunda etappa cun 1,120 milliuns ed il 2019 ina tierza cun 980'000 francs. Era cheu setracta ei da lavurs ch'ei urgentas suenter 35 onns. La vischnaunca da Laax sa investar ton bia grazia alla buna situaziun finanziaria. Las numerusas investiziuns ein denton negin motiv dad alzar la taglia. Ils presents ein suandai la proposta da schar il pei da taglia pil 2017 sco tochen dacheu sin 58 pertschien dalla taglia cantunala sempl. Plinavon ha la radunonza approbau la damonda da credit da 200'000 francs. Quella summa sa la fundaziun Pro Laax surdar alla vischnaunca politica per la tegia d'ual en Val Verena che vegn construida igl onn proxim.

Treis fideivels collaborators

La radunonza communal da Laax ha era approbau senza discussiun duas cunvegnas

da prestaziun culla Regiun Surselva. Tier las informaziuns e comunicaziuns ha il president da HotellerieSuisse dil Grischun, Ernst Wyrsch, orientau dalla nova candidatura grischuna per l'olimpiada 2026. El ha intinai da sustener quei niev project lantschus suenter ch'il comite olimpic internaziunal haveva midau sias cundiziuns generalas. Plinavon ha il cussegliader extern Primo Berera presentau il catalog da mesiras ch'ei previdas per sustener e promover l'attractivita da Laax. Il project ei titulau «Fascinaziun Laax» e cuntegn differents impuls ed inscenaziuns.

La finala ha il president communal Franz Gschwend aunc saviu undrar treis fideivels collaborators da cader che van il 2017 en pensiun. Tuts treis ein dall'annada 1952, igl ein quei Toni Cadruvi, Gieri Arpagaus e Gion Battista Camathias.

In post da cussegliaziun per senioras e seniors

Ina nova purschida dalla vischnaunca da Mustér, Puntreis e Pro Senectute Grischun

DA HANS HUONDER / ANR

■ La part su dalla Surselva dispona ussa d'in post da cussegliaziun per seniors. El ei vegniu realisau dalla vischnaunca da Mustér en connex cun il project Seniors-Ca e dalla Pro Senectute Grischun. Il post sesanfla el Puntreis Center da sanadad SA. Leu stat in biro a disposiziun persuenter. Cun la finamira d'instradar novas purschidas pils seniors ha la vischnaunca da Mustér iniziou pliras sentupadas, cumbinadas cun luvratori e lavurs en gruppas. Sut il tetg dil project Seniors-Ca ei vegniu discutau davart engaschaments voluntaris per visetas e spassegiadas, mobi-

litas e survetschs da transport, occurrenz, cultura, coordinaziun da contacts ed habitar ella vegliadetgna. Sco quei che la geraua Cecilia Maissen-Desax di ein buca tuttas gruppas da lavur arrivadas als resultats giavischai. In tal project pretendi temps da crescher e sesviluppar. In project ch'ei s'avanzaus speditivamein ei quel d'in post da cussegliaziun per senioras e seniors a Mustér. La vischnaunca dumbra varga 650 vischinas e vischins ella vegliadetgna sur 60 onns. Sco quei che Maissen constatescha han biars il giavisch da saver viver aschi ditg sco pusseivel ellas atgnas quater preits, mo tonaton cun bien contact tier la societad. «Per quei motiv eis ei impurtont d'haver ac-

cess e da saver nezegiar pusseivladads e survetschs che levgieschan la veta autonoma ed aschia sesentir acceptaus e finalmein era da restar sauns», di la responsabla pil departament da sanadad dalla vischnaunca da Mustér. Satisfatga eis ella per quei motiv dil success che la gruppa d'occurrenz, cultura, coordinaziun e contacts ha giu. Ella ha organisau ver diesch arranschaments da sentupada.

In basegns

Medemamein ha l'idea d'in post da coordinaziun ed informaziun per senioras e seniors a Mustér saviu vegnir concretisau. Sco quei ch'ils responsabls declaran ei quel staus in giavisch da biaras e biars. La gievgia da miezdi ei vegniu orientau davart quella purschida nova dalla vischnaunca da Mustér e dalla Pro Senectute Grischun. Il post sesanfla tier Puntreis Center da sanadad SA. Tier quel san ils interessents s'annunziar e vegnan lu intermediari alla Pro Senectute. Il menader dil post da quella en Surselva, Curdin Casaulta, occupa il post a Mustér ina ga il meins, mingamai la tierza gievgia dil meins. Tenor Maissen stat la purschida a disposiziun era a vischinas e vischins d'autras vischnauncas. Quellas duein allura era vegnir contactadas il proxim temps per ch'il survetsch sappi era vegnir derasaus leu. El post en Puntreis san senioras e seniors giavischar ina cussegliaziun persunala generala ni era sclariment per exempel pertucont fatgs finanzials. Il survetsch ei gratuits. Suenter in onn

d'emprova vegnan las experienschas fatgas cul post da cussegliaziun evaluadas per saver decider schebein quella purschida duei vegnir mantenida vinavon.

Satisfatgs dalla soluziun

Alla presentaziun dil post la gievgia avonmiezdi ha Claudio Senn, meinafatschenta dalla Pro Senectute Grischun, exprimiu sia satisfacziun davart il post a Mustér: «En ina casa sco Puntreis selai la gliued plitost cussegliar. Igl ei in liug ideal persuenter.» Il post che vegn menaus a Mustér sco project da pilot ei cumparegliabels cun autras purschidas el cantun, sco per exempel ellas valladas dil sid. Tenor Senn ein lezzas secumprovadas, il medem spetga el dil post a Mustér. Era per la casa sezza ei quei post d'impurtonza. «Seniors ch'enconuschon forsa buca noss'instituziun san far enconuschentschas cun quella sin quella via ed aschia eliminar retenientschas.» Puntreis daventi aschia in tec alla ga era in center da cumpetenza per fatgs da seniors. «Nus selegrein dalla partenza da quei survetsch e sperein naturalmein ch'el vegni nezegiaus stediamein. La finfinala dependa il success schebein el vegn mantenius a lunga vosta», di Maissen. Il post en Puntreis vegn menaus sin fundament d'ina cunvegientscha da prestaziun.

Sclariment ed annunziats mingamai da gliendis entochen venderdis naven dallas 08.00-12.00 e naven dallas 13.30-16.30 per telefon 081 929 56 56 ni direct en Puntreis. Ina ga il meins ei il post da cussegliaziun occupaus da Curdin Casaulta dil post Pro Senectute Grischun/Surselva, telefon 081 925 43 26.



Curdin Casaulta dalla Pro Senectute, geraua Cecilia Maissen-Desax ed il meinafatschenta da Puntreis Diego Deplazes (da sen.) selegran dalla purschida nova. FOTO H. HUONDER

■ DESERTINA BULLS

Bunas prestaziuns – nul puncts

UHC Desertina Bulls – RD March-Höfe Altendorf 2:3 (0:1)

La dumengia suenter Sontgaclau ein ils Bulls semess sin via encunter Altendorf. Igl adversari ei stada l'equipa da casa per igl emprem giug. Ella tabella eran ils dad Altendorf gest davos ils da Mustér aschia ch'ins ha saviu s'imaginar ch'ei detti in giug fetg stretg ed che omisduas equipas veglien per tut prezi prender cun ellas dus puncts ord quella partida. Diesch minutas ein las equipas sepapadas ina vid l'autra cun haver schanzas sin omisduas varts. En quei mument han ils Red Devils pudiu marcar igl 1:0. Entochen pausa ei la partida puspei stada uliva cun schanzas sin mintga vart. Siat minutas suenter pausa han ils Bulls lu saviu marcar igl 1:1 cun in siet dad Adrian Flepp sin in pass da Dario Schuoler.

Cuort suenter, ella 30avla minuta, ein ils adversaris puspei i en avantatg. Denton cun plein engaschi e curascha ha Rico Bearth saviu marcar cuort suenter il 2:2 sin in pass da Livio Cajochen. Il giug cuzzava aunc rondun tshun minutas ed omisduas equipas levon aunc marcar in gol per recaltgar quels impurtonts dus puncts. En ina fasa hectica alla fin ei il cletg buca staus sin la vart dils Bulls. Diesch secundas avon la fin ei Altendorf vegnius da stuschar la balla sur la lingia suenter in schischuri avon il gol dils da Mustér ed aschia gudignar il giug cun 3:2.

UHC Desertina Bulls – Chur Unihockey 3:5 (1:5)

Per il secund giug encunter Cuera ein ils Bulls stai fetg motivai da recaltgar puncts. Denton eran ei pertschats che Cuera ei in bien ton pli ferm ch'ils emprems adversaris d'Altendorf. Plein curascha ein ils da Mustér semess sin il plaz. Denton suenter miez dalla emprema mesadad eran il Bulls gia cun 3:0 anavos. Cuera ha pudiu marcar ella 6avla, ella 10avla ed ella 13avla minuta in gol. Ella 16avla minuta ei Rico Bearth vegnius da sittar igl 1:3 cun in bellezza siet el cantun. Quei han ils da Cuera buca schau plascher e reagau immediat cun ils gols 4 e 5 ella 17avla e 18avla minuta. Aschia ch'ils Bulls ein i cun in retard da quater gols ella pausa. Ch'ils Desertina Bulls dettien buca si era clar naven dall'entschatta. Suenter in pèr buns plaidis dils trenaders Florian Zanin e Martin Schwyter ha la secunda mesadad saviu ir libra. Cun bia engaschi e cun mobilisar las davosas forzas ei Severino Giger vegnius da marcar il 2:5 ella 30avla minuta. Cuort avon la fin ha Simon Decurtins aunc sittau il 3:5 per ils Bulls. Per dapli hai denton buca tuschiu.

Tut en tut eis ei stau ina dumengia senza puncts, denton cun fetg bien engaschi, spèrt d'equipa, slontsch e motivaziun per trenar vinavon ed ir en ils proxims giugs 2017.

Giugadors

UHC Desertina Bulls: Flavio Schuoler, Martin Schwyter, Dario Schuoler, Simon Decurtins, Adrian Flepp, Ursin Deflorin, Andreas Huonder, Severino Giger, Rico Bearth, Pascal Huonder, Arno Pfister, Livio Cajochen, Yannick Flepp (senza: Joey Manetsch, Silvan Giger, Angelo Vincenz ed Andri Nay).

Ursin Deflorin

reclama

Ilanzer Geschenkkarte
Freude schenken

Il regal pign e simpatic da refer en 29 fintschortas a Gion